



UKA 2018/151
13. november 2018
Bentiaraq Ottosen

Sisimiut Kangerlussuullu akornanni aqqusinermik qimuttuitsulluunniit aqquataannik pilersitsisoqassagaluarpat inuussutissarsiornikkut periarfissat suut pilersinneqarsinnaanersut pillugit apeqquateqaat aallaavigalugu oqallisissiaq.

(Inatsisartuni ilaasortaq Peter Olsen, Inuit Ataqatigiit)

Inatsisartunut ilaasortaq Peter Olsen-imit Inuit Ataqatigiit oqallisissianngortinneqartoq Atassummiit qujavugut.

Atassummiit nuannaarutigaarput suliat taamatut killissinnaammata, nunatsinni ineriartortitsineq sumiiffinni aalajangersimasuinnaangitsuni siunissaq ungasinnerusoq eqqarsaatigalugu siunertarineqarnera isumaqarpugut aqquutissiususoq.

Sisimiut aamma Kangerlussuup akornanni aqqusineq naammassineqarpat periarfissarpassuarnik inuiaqatigiinni ammaasisuussaaq, soorlu inuiaqatigiinni suliffissaqartitsinikkut annertuumik kinguneqartitsisussaalluni. Atassummiit oqaatigiuarparput aqqusineq tamanna pilersinneqarpat pinngitsoorani inuussutissarsiutitigut annertuumik aningaasarsiorfigisinnaalluakkatsinnik pilersitsissasugut, tamannami aamma anguniartuarlugu politikkikkut suliaqarnitta takutittarpaa qanoq inuussutissarsiornep tungaasigut uukkataqartiginersugut.

Takornariaqarneq eqqaaneqarsinnaavoq, nalunngilluinnarparput ullumikkut takornariaqarnermik ingerlatsineq qanoq siuariartuinnavitsigisoq. Sumiiffinni takornariaqarfiusuni annertuumik suliassaqarpugut, tamanna aamma naapertuulluinnartuuvuq inuussutissarsiutitigut ataasiakkaanik uukkataqaannarata periarfissat nutaanerumaat eqqartornissaannut immitsinnut periarfississalluta. Atassummiit isumaqarpugut nunatsinni pissuussutit isigiinnalersimasavut inuussutissarsiornermut saatillugit avammut takusassiarinissaat, tamanna pingaaruteqarluinnarpoq orniginarsaanikkut periarfissat mattussuunagit ineriartortitsissasugut.

Suliaq una Sisimiut aamma Kangerlussuup akornanni aqqusinniortoqarnissaanut pilersaarut maannakkut Qeqqata Kommuniiani siuttuuffigineqartoq Atassummiit nuannaarutigaarput, soorunalimi tamanna aamma Naalackersuisut peqatigalugit isumaqatigiissusiortoqarnissaa Atassummiit pissanngatigaarput qanoq ingerlariaqqittoqarnissaa anguneqassanersoq.



Qeqqata Kommuniata akisussaafferujussuaq tigummivaa tamannalu imminut napatinnissamik siunnerfeqarnerup aqqani ataqqinaataassaaq, tassami inuk qitiutillugu ineriartornermut malinnaatinneqarnissaa inuussutissarsiutitigut sukkulluuniit pingaaruteqaqimmat Atassummiit nuannaarutigilluinnarparput.

Nunap immikkoortortarujussua UNESCO-mut ilaasortaasooq naatsorsuutigilluinnarparput tamanna pinngortitarsuup tunissutaanik pingaarutilimmik immikkuullarissumillu takornariaqarnikkut inissisimanissaa, kisiannili sumiiffinni assigiinngitsuni UNESCO-mut ilaasortaasut ineriartortinnissaa tamanna aamma pisussaaffiliissaaq. Qeqqata Kommunia aallaaviusinnaavoq qitiusumik takornariaqartitsinikkut ingerlatsinermi, tamanna takornariaqarnerup ineriartortinneqarnissaa agguluttumiinngitsoq ingerlanneqarnissaa Atassummiit pingaartipparput.

Ukiorpassuannngortuni politikikkut oqariartuutigineqartuarpoq Sisimiut aamma Kangerlussuup akornanni aqqusiniortoqartariaqartoq, tamanna Atassummiit sukataarullugu Inatsisartuni ilaasortaasut peqatigalugit suleqatiseraagut, piviusunngortitsisinnaaneq aamma timitaliisinnaaneq angorusullugu.

Suliap aallartereerpera pillugu Qeqqata Kommuniata suliniutai ataqqilluinnarlugit tapersorsorlugillu Atassummiit oqariartorpugut, politikikkullu sinaakutissat inissinnissai Atassummiit peqataaffigissavarput.